


Oz èn ils Dis europeics dal patrimoni



SETTEMBER

Ils Dis europeics dal patrimoni

Tge sa zuppa davos las portas e la miraglia d'in chastè? Tgi ha costruì la tur da crap e co vesa ella or a l'intern? Quant vegl è il viaduct e per tge tegna el anc adina?

Chastels, turs, viaducts e punts veglias ans pudessan raquintar bleras istorgias dal passà – sch'els pudessan discurren ... Dar il pled a tals monuments, a quests patrimoni dal passà, quai è l'idea dals Dis europeics dal patrimoni u per tudestg «Denkmaltage».

Ils Dis europeics dal patrimoni datti en 50 pajais. En Svizra han els lieu mintgamai la segunda fin d'emna da settember. Durant quests dus dis has ti la schanza da scuvrir ils stgazis da pli baud e da vegnir a savair lur istorgias e misteris.


Impurtants patrimoni en il Grischun èn per exempel las lingias da la Viafier

retica da l'Alvra e dal Bernina.

Questas lingias da tren mussan numnadamain en tge moda e maniera geniala ch'ils umans han costruì gia avant passa 100 onns, per exempel las punts ed ils viaducts renumads. Per punts, vias e sendas vai l'onn 2024 als Dis europeics dal patrimoni. Il motto è «collià». Las colliaziuns – saja quai lingias da tren u vias – eran impurtantas per il barat da rauba. Persunas da differents lieus èn vegnidas ensemen grazia a las colliaziuns ed uschia hai puspè dà novas colliaziuns ed or da quai magari era novs monuments e novs misteris ...

Tge sort da colliaziuns e monuments ch'i dat da scuvrir als Dis europeics dal patrimoni ed il program per uffants e creschids chattas ti sin:

- www.kulturerbe-entdecken.ch



Quant veglia è tia chasa?

Tge è per tai in stgazi da pli baud?

In monument po er esser ina statua d'ina persuna renumada.

Has ti gia vis ina statua? Da tgi?

Per tge u per tgi construissas ti ina statua?

Daventa detectiv:a da patrimoniis!

1


Prenda in bloc ed in rispli, in telefonin u in apparat da fotografar, in cum-pogn u ina cumpogna e fa ina spassegiada tras tes vitg.

Guarda ina giada bain las chasas veglias, las punts, las turs u ils chastels (sch'i dat da quels) ed autras chaussas interessantas da pli baud. Tscherna in da quests patrimoniis e disegna u fotografescha el.

Emprova d'eruir:

- Quant vegl è tes patrimoni?
- Quant impurtant è el?
- Per tgi è el impurtant?
- Pertge datti quest patrimoni?
- Tge valor aveva el pli baud e tge valor ha el oz?
- Èsi in bel patrimoni?

Va en il biro da turissem u dumonda ina persuna da tes vitg ch'enconuscha fitg bain tut quai da pli baud. Fa ina descripziun curta da tes patrimoni.



Descripziun dal patrimoni

1

Quant vegl è tes patrimoni? _____

Quant impurtant è el? _____

Per tgi è el impurtant? _____

Pertge datti quest patrimoni? _____

Tge valur aveva el pli baud? _____

E tge valur ha el oz? _____

Èsi in bel patrimoni? _____



Fa in patrimoni per palpar

2

Ti dovras:

- models (guarda las paginas suandantas)
- palpiri pli gross
- in rispli
- colla

Prenda in model, per exempel la baselgia. Disegna ella cun rispli sin il palpiri pli gross. Prenda uss la colla e va suentar cun ella las lingias dal rispli. Lascha sientar la colla. Cura che la colla è sitga, pos ti serrar ils egls e palpar las lingias da colla cun la detta.

Sche ti fas tut ils patrimoni cun colla (tut ils models), pos ti far in giu ordlonder:

lascha palpar tes cumpogn u tia cumpogna ils maletgs. Chattan els ora tge patrimoni ch'els palpan?

